



**SECRETARIA DE ESTADO
DA PROMOÇÃO DA IGUALDADE**

V Governo Constitucional

Gabinete da
Secretaria de Estado

Aniversariu Tinan Atus Ida Direitu Feto Noruega ba Vota

Seminariu Dader – Rede Feto no NORAD

Fokus: Justisa ba Feto

Direitu Feto iha Timor-Leste no Knaar Governu Timor-Leste

Kinta-Feira, 13 Juñu 2013, oras tuku 09.00-11.00.

Exelensia Representante sira husi Ministériu Negosius Estranjeirus no NORAD,
Sra. Anne Hellum husi Universidade Oslo,

Representante Rede Feto Noruega husi Akademia, Instituisaun Peskiza, Feto
ONG sira, no Sindikatu sira,

Señora no Señor sira.

Uluk nanain iha biban ida ne'e hau hakarak agradese ba NORAD ne'ebé fasilita
Seminariu ida ne'e hamutuk ho Rede Feto Noruega, ne'ebé importante atu rona
perspetiva husi movimento feto sira seluk. Iha Timor-Leste, rede feto
apartidaria harii iha tinan 1998, ho naran Organização das Mulheres de Timor
(OMT). Ami nia rede, ho naran Rede Feto Timor-Leste, harii iha tinan 2000
ne'ebé halibur organizasaun feto hamutuk 16 iha mahon ida hodi halo *lobby*
hamutuk ba asuntu feto sira.

Nu'udar ita boot sira hatene ona karik, Timor-Leste mak NASAUN foin
independente, ami selebra ami nia Restaurasaun Independensia ba dala 11 iha
tinan ida ne'e. Hahú husi Restaurasaun Independensia iha tinan 2002, ami ho
intensivu hala'o harii NASAUN. Aliansa makaas setór hotu-hotu mak esensiál liu,

la'ós deit iha movimentu feto nia laran, li-liu relasiona ho asesu ba justisa, nu'udar área ida ne'ebé mane mak domina hori uluk kedes iha mundo tomak.

Timor-Leste agora dadauk sei iha pasu konsolidasaun no sei falta rekursu umanu no rekursu tekniku, Governu depende ba aliansa sira ho prestador servisu naun-governamental. Buat ida ne'ebé importante liu iha kontestu justisa ba feto mak resposta ba violénsia bazeia ba jéneru.

Estastístika husi Peskiza Demografika Saúde iha tinan 2010 hatudu katak 38% feto Timor-Leste iha ona esperiensia kona-ba violénsia fizika hahú husi idade tinan 15, no autór prinsipál maka laen ka namoradu. Violénsia doméstika mak forma ida husi violénsia bazeia ba jéneru ne'ebé barak liu.

Iha Timor-Leste ami iha Rede Referál multi-setorál, ne'ebé fó apoiu ba vítima violénsia bazeia ba jéneru liu husi servisu koordenadu Governo-ONG-Organizasaun Sosiedade Sivil, hanesan husi Unidade Ema Vulneravel PNTL, Departamentu Protesaun Feto no Fámlia Vulneravel husi Ministériu Solidariedade Sosiál, Asisténsia Legál husi ONG espesializada hanesan ALFeLa (Asisténsia Legal ba Feto no Labarik), servisu uma mahon husi ONG no Instituisaun Relijioza sira, no servisu suporta jerál husi FOKUPERS, ne'ebé inklui akompañamentu vítima ba prosesu legal tomak, servisu uma mahon, no atividade hakbiit ekonomia ba vítima.

Sekretaria Estadu ba Promosaun Igualdade ne'ebé hau lidera mós harii aliansa espesiál ho Igreja Katolika. Suporta husi bispo sira no padre sira mak importante liu ba esforsu atu hetan Lei Kontra Violénsia Doméstika iha tinan 20120. Dezenvolvimentu lei ne'e han tempu tinan 10.

Ba implementa Planu Asaun Nasionál kona-ba Violénsia bazeia ba Jéneru (PAN VBJ), ne’ebé adota iha tinan 2012, mós presiza aliansa. Planu ne’e foka ba implementasaun provizaun husi Lei Kontra Violénsia Doméstika, no buka atu harii estrutura ba koordenasaun no implementasaun efikaz ba esforsu sira ne’e. Hau nia instituisaun lidera Koordenasaun Inter-Ministeriál ba PAN VBJ. PAN ne’e iha área prioridade estratégika haat: “Prevensaun Violénsia bazeia ba Jéneru,” “Prestasaun Servisu ba Vítima Violénsia bazeia ba Jéneru,” “Asesu ba Justisa,” no “Koordenasaun, Monitorizasaun no Avaliasaun.”

Iha ministériu importante 5, ONG importante 3, no Provedoria dos Direitos Humanos no Justiça (PDHJ) ne’ebé sai nu’udar pontu fokál iha Koordenasaun ne’e, ho rede boot ne’ebé inklui mós doadores sira no parte interezada sira seluk.

Mekanizmu koordinasaun boot liu mak Grupu Traballu Jéneru, ne’ebé estabelese tinan rua liu ba liu husi Rezolusaun 27/2011. Ne’e hadi’a mekanizmu Pontu Fokál Jéneru ne’ebé hala’o servisu hahú husi tinan 2008. Iha nível nacionál, Grupu Traballu Jéneru existe iha Governu tomak iha Ministériu no Sekretaria Estadu nia laran, lidera husi sira-nia Diretór Jerál ida-idak, ho membru husi nível Diretór. Iha nível distritál, Grupu Traballu Jéneru lidera husi Sekretáriu Distritu, ho membru multi-setorál, hanesan Xefe Unidade Ema Vulneravel husi Polisia Distritál, Diretór Distritál husi Ministériu Solidariedade Sosiál, Ministériu Saúde, Ministériu Edukasaun, Ministériu Infra-estrutura, no Ministériu Agrikultura. Grupu Traballu Jéneru sira ne’e reforsa esforsu ba implementa abordajen integradu jéneru, liu husi reuniaun regular, no asegura katak sira-nia Planu Anuál no orsamentu sensivel ba jéneru, no inklui provizaun ba implementasaun PAN VBJ.

Aliansa estratéjika seluk mak hala'o ho Asosiasaun Mane Kontra Violénsia (AMKV) no Mane ho Visaun Foun (MHVF). Iha tinan 2012, organizasaun rua ne'e organiza kolókiu ho lider lokál sira, inklui lia nain, polísia, grupu arte marsiais sira, no seluk-seluk tan. Kolókiu ne'e hare liu ba Lei Kontra Violénsia Doméstika no oinsa mane sira bele kontribui ba redusaun violénsia doméstika iha sira nia komunidade. Maioria husi lider lokál sira ne'e mak mane, tan ne'e efikaz liu sei mane sira ne'ebé sensivel ba jéneru hato'o ideias kona-ba rezolusaun ba problema liu husi dalan ne'ebé la uza violénsia. AMKV mós organiza ona eventu desportu nu'udar dalan ida atu aumenta koñesimentu ema barak kona-ba violénsia doméstika.

Hau pronto atu diskute no aprende barak liu tan husi kolega sira no Rede Feto Noruega kona-ba oinsa atinje justisa ba feto. Vizaun husi Governu Timor-Leste maka sosiedade ne'ebé justu jéneru, ne'ebé ninia lei no kultura valoriza, proteze, no promove dignidade, direitu umanu, no direitu feto.

Takk (Obrigada)